

摘藻堂四庫全書薈要

史部

欽定四庫全書薈要卷六千九百十史部

明史卷三百十七

大學士張廷玉等奉 敕修

列傳第二百五

廣西土司

廣西徭獞居多盤萬嶺之中當三江之險六十三山倚為巢穴三十六源踞其腹心其散布於桂林柳州慶遠平樂諸郡縣者所在蔓衍而田州泗城之屬尤稱强悍

種類滋繁莫可枚舉蠻勢之衆與滇為埒今就其尤著者列於篇觀其叛服不常沿革殊致可以覘中國之德威知蠻情之順逆為籌邊者之一助云

廣西土司一

桂林

柳州

慶遠

平樂

梧州

潯州

南寧

桂林自秦置郡漢始安唐桂州後改建陵郡宋靜江府
元靜江路明初改桂林府為廣西布政使司治所屬內
地不當列於土司然廣西惟桂林與平樂潯州梧州未
設土官而無地無猺獞桂林之古田平樂之府江潯州
之藤峽梧州之岑溪皆煩大征而後克卒不能草薶而
獸獮之設防置戍世世為患是亦不得而畧焉洪武七
年永道桂陽諸州蠻竊發命金吾右衛指揮同知陸齡
率兵討平之二十二年富川縣逃吏首賜糾合苗賊盤

大孝等為亂殺知縣徐元善等往來劫掠廣西都指揮
韓觀遣千戶廖春等討之禽殺大孝等二百餘人觀因
言靈亭鄉乃徭蠻出入地雖征勦有年未盡殄滅宜以
桂林等衛贏餘軍士置千戶所鎮之詔從其請二十七
年全州灌陽等縣平川諸源徭民聚衆為亂命湖廣廣
西二都司發兵討之禽殺千四百餘人諸徭奔竄遁去
置灌陽守禦千戶所初灌陽縣隸湖廣因廣西平川等
三十六源徭賊作亂攻擊縣治詔寶慶衛指揮孫宗總

兵討平之縣丞李原慶因奏灌陽去湖廣遠隸廣西近
遂以灌陽隸桂林府千戶所命廣西都指揮同知陶瑾
領兵築城守之永樂二年總兵韓觀奏潯桂柳三郡蠻
寇黃田等累行劫掠殺擄人畜已調都指揮朱輝追剿
斬獲頗多尋蒙遣官齎敕撫安其黃田等徭皆已向化
悉歸所擄人畜帝命觀復業者善撫恤之宣德六年都
督山雲奏廣西左右兩江設土官衙門大小四十九處
蠻性無常讐殺不絕朝廷每命臣同巡按御史三司官

理斷緣諸處皆瘴鄉兼有蠱毒三年之間遣官往彼死者凡十七人事竟不完今同衆議凡土官衙門軍務重事徑詣其處其餘爭論詞訟就所近衛理之報可景泰五年廣西古丁等洞賊首藍伽韋萬山等糾合蠻類劫掠南寧上林武緣諸處鎮守副總兵陳旺以聞詔令總督馬昂等勦捕之初桂林古田獐種甚繁最强者曰韋曰閉曰白而皆并於韋賊首韋朝威據古田縣官竄會城遣典史入縣撫諭烹食之弘治間大征殺副總兵馬

俊叅議馬鑑正德初再征殺通判知縣指揮等官嘉靖
初又征之殺指揮舒松等時韋銀豹與其從父朝猛攻
陷洛容縣據古田分其地為上下六里銀豹出掠挾下
六里人行而上六里不與焉四十五年提督吳桂芳因
其閒遣典史廖元入上六里撫諭之諸獍復業者二千
人銀豹勢孤請降久之復猖獗嘗挾其五子據鳳皇連
水二寨襲殺昭平知縣魏文端更自永福入桂林劫布
政司庫殺署事叅政黎民衷縋城而去官軍追不及久

之臨桂永福各縣兵羣起捕賊始得賊黨扶嫩土婆顯等三十餘人於各山寨中時首惡未獲隆慶三年朝議以廣西專設巡撫推江西按察使殷正茂為僉都御史以往正茂至奏請勦賊合土漢兵十萬集衆議時八寨助逆衆議先勦敕書亦有先平八寨徐圖古田之語正茂獨不謂然先給榜諭八寨八寨聽命然後分兵七哨以總兵俞大猷統之使副總兵門崇文叅將王世科黃應甲都司董龍魯國賢遊擊丁山等各領一哨復分土

兵為二隊更番清道必先清數里而後行及至其巢合
營攻之斬七千四百六十餘級生禽朝猛梟於軍俘獲
男女千餘口銀豹窮威擇肖己者斬首獻捷聞既而生
縛銀豹并其子扶枝膠送京師斬之古田平乃并八寨
與龍哈哱咳為十寨立長官司以黃昌等為長官及土
舍聽守禦調度更陞古田縣為永寧州已而永寧獐韋
狼要與其黨黃銀成有隙相仇殺常安巡檢欲窮治之
狼要遂與右江荔浦山灣諸獐稱亂命指揮徐民瞻將

兵捕之民瞻伏兵執狼要諸猺大訐總制殷正茂巡撫
郭應聘乃檄徵田州向武都康諸土兵屬叅將王瑞進
勦斬廖金鑑廖金蓋韋銀花韋狼化等萬歷六年總制
凌雲翼巡撫吳文華大征河池咳嗽諸猺斬首四萬八
百餘級嶺表悉平

柳州置自唐貞觀中明初移治于馬平所屬州二縣十
內屬千餘年惟上林縣尚為土官而賓象融羅諸猺蠻
蟠結為寇城外五里即賊巢軍民至無地可田後屢加

征勦置土巡檢於各峒隘稍稱寧焉洪武二年中書省
臣言廣西諸峒雖平宜遷其人入內地可無邊患帝曰
溪洞蠻獠雜處其人不知禮義順之則服逆之則變未
可輕動惟以兵分守要害以鎮服之俾日漸教化數年
後可為良民何必遷也永樂七年柳州道村寨蠻韋布
黨等作亂都指揮周誼率兵討禽之命斬布黨象其首
於寨廣西洞蠻韋父融縣羅城洞蠻潘父惹各聚衆為
亂柳州等衛官軍捕斬之九年賓州遷江縣象州武仙

縣古逢等洞蠻獠作亂詔發柳州南寧桂林等衛兵討之十四年融縣獠民作亂官軍討平之十七年象州土吏覃仁用言其父景安故元時常任本州巡檢有兵獠二百人今皆為民請收集為軍帝不許十九年融縣蠻賊五百餘人羣聚剽掠廣西叅政耿文彬率民兵會桂林衛指揮平之柳州等府上林等縣獠民梁公竦等六千戶男女三萬三千餘口及羅城縣土酋韋公成乾等三百餘戶復業初韋公等倡亂獠民多亡入山谷與之

相結事聞遣御史王煜等招撫復業至是俱至隸籍為
民宣宗即位蠻寇覃公旺作亂據思恩縣大小富龍三
十餘峒固守險阻以拒官軍總兵官顧興祖等督兵分
道攻之斬公旺并其黨千五十餘人捷至帝曰蠻民亦
朕赤子殺至千數豈無脇從非辜者以後宜開示恩信
撫慰而降之如賈琮戍交州可也元年柳州獠首韋敬
曉等歸附二年廣西三司奏柳慶等府賊首韋萬黃韋
朝傳等聚衆劫殺為民害敕興祖進兵勦平之懷遠為

柳州屬邑在右江上游旁近靖綏黎平諸徭竊據久隆慶時大征古田懷遠知縣馬希武欲乘間築城召諸徭役之許犒不與諸徭遂合繩坡頭板江諸峒殺官吏反總制殷正茂請於朝遣總兵官李錫叅將王世科統兵進討官兵至板江徭賊皆據險死守正茂知諸徭獨畏永順鉤刀手及狼兵乃檄三道兵數萬人擊太平河裏諸村大破之連拔數寨斬賊首榮才富吳金田等前後捕斬凡三千餘俘獲男婦及牛馬無算事聞議設兵防

改萬石宜良丹陽為土巡司屯土兵五百人且耕且守
萬歷元年洛容知縣邵廷臣以養歸主簿謝漳行縣事
會上元夜單騎巡檄山中獍韋朝義率上油古底諸
獍夜半出掠逐漳追至城殺漳奪縣印去是夜指揮朱
昌允土巡檢韋顯忠共提兵決戰斬首三十一級兵校
文斌獲朝義奪還縣印守巡官以聞乃命總兵李錫參
將王瑞康仁等勦之破上油古底諸寨斬覃金狼等二
千八百三十餘級俘二百二十餘人牛馬器械稱是後

殘獍黃朝貴復合融縣徭號萬人聲言欲入富福鎮王世科復引兵擊之斬五十餘人始洛容在萬山中城小無雉堞縣官皆寓府城知縣余涵請遷城於白龍巖不果至是謝漳遂及於難又韋王朋者馬平獍也初平馬平時因建營堡使土舍韋志隆提兵屯其地王朋視堡兵如仇常率東歐大產諸蠻要挾營堡兵備周浩使千總往撫遂殺千總劫村落總兵王尚父勦平之

慶遠秦象郡漢為鬱林郡地晉以後淪於蠻唐始置粵

州天寶初改龍水郡屬嶺南道乾封中更宜州宋陞慶
遠軍節度咸淳初改慶遠府元為慶遠路洪武元年仍
改慶遠府時征南將軍楊文既平廣西二年行省臣言
慶遠府地接八番溪洞所轄南丹宜山等處宋元皆用
其土酋安撫使統之天兵下廣西安撫使莫天護首來
款附宜如宋元制錄用以統其民則蠻情易服守兵可
減帝從之詔改慶遠府為慶遠南丹軍民安撫司置安
撫使同知副使經歷知事各一員以天護為同知王毅

為副使三年行省臣言慶遠故府也今為安撫司其地
皆深山曠野其民皆安撫莫天護之族天護素庸弱宗
族强者動肆跋扈至殺河池縣丞蓋讓與諸蠻相煽為
亂此豈可姑息以貽禍將來乞罷安撫司仍設府置衛
以守其地報可乃命莫天護赴京七年賜廣西土官莫
金文綺六匹置南丹州隸慶遠府以莫金為知州八年
那地州土官羅貌來朝以貌知州事二十八年都指揮
韓觀率兵捕獲宜山等縣蠻寇二千八百餘人斬偽大

王韋召偽萬戶趙成秀韋公旺等傳首京師時嶺南盛暑官軍多病瘴帝命觀班師南丹土官莫金叛帝命征南將軍楊文龍州平後移師討南丹奉議等處龍州趙宗壽來朝謝罪貢方物大軍進征奉議調叅將劉真分道攻南丹破之執莫金併俘其衆後遣寶慶衛指揮孫宗等分兵擊巴蘭等寨蠻獠懼焚寨遁去官兵追捕斬之蠻地悉定詔置南丹奉議慶遠三衛以官軍守之二十九年廣西布政司言新設南丹等三衛及富川千戶

所歲用軍餉二十餘萬石有司所徵不足以給帝命俱置屯田給耕種尋遣中使至桂林等府市牛給南丹奉議諸衛軍士都指揮姜旺童勝率兵抵思恩縣鎮寧等村洞殺獲叛蠻三千餘人降一千一百餘戶得故宋銅印一來上永樂二年慶遠府言忻城宜山二縣洞蠻陳公宣等出沒為寇請勦捕帝命都指揮朱輝親往撫諭公宣等相率歸附凡千三十五戶荔波縣民覃真保上言縣自洪武至今人民安業惟八十二洞徭民未隸編

籍今聞朝廷加恩撫綏咸願為民無由自達乞遣使招
撫乃命右軍都督府移文都督韓觀遣人撫諭其願為
民者量給賜賚復其徭役三年宣德五年總兵官山雲
討慶遠蠻寇斬首七千四百平之九年雲奏思恩縣蠻
賊覃公砦等累年作亂今委都指揮彭義等率兵勦捕
斬賊首梁公成潘通天等梟之仍督官軍搜捕餘黨帝
賜敕慰勞又奏慶遠鬱林等州縣蠻寇出沒必宜勦除
而兵力不足帝命廣東都司調附近衛所精銳士卒千

五百人委都指揮一員赴廣西聽雲調用十年南丹土官莫禎來朝貢馬賜綵幣正統四年莫禎奏本府所轄東蘭等三州土官所治歷年以來地方寧靖宜山等六縣流官所治溪峒諸蠻不時出沒原其所自皆因流官能撫字附近良民而溪峒諸蠻恃險為惡者不能鈐制其出沒每調軍勦捕各縣居民與諸蠻結納者又先漏洩軍情致賊潛遁及聞招撫詐為向順仍肆劫掠是以兵連禍結無寧歲臣竊不忍良民受害願授臣本州土

官知府流官總理府事而臣專備蠻賊務禽捕殄絕積
年為害者其餘則編伍造冊使聽調用據巖險者拘集
平地使無所恃擇有名望者立為頭目加意撫恤督勵
生理各村寨皆置社學使漸風化三五十里設一堡使
土兵守備凡有寇亂即率衆勦殺如賊不除地方不靖
乞究臣誑罔之罪帝覽其奏即敕總兵官柳溥曰以蠻
攻蠻古有成說今莫禎所奏意甚可嘉彼果能効力省
我邊費朝廷豈惜一官爾其酌之弘治九年總督鄧廷

瓚言廣西猺獞數多士民數少兼各衛軍士十七八九
凡有征調全倚土兵乞令東蘭土知州韋祖鉉子一人
領土兵數千於古田蘭麻等處撥田耕守候平古田改
設長官司以授之廷議以古田密邇省治其間土地多
良民世業若以祖鉉子為土官恐數年之後良民田稅
皆非我有欲設長官司祇宜於土民中選補廷瓚又言
慶遠府天河縣舊十八里後漸為獞賊所據止餘殘民
八里請分設一長官司治之部議增設永安長官司授

土人韋萬妙等為正副長官并流官吏目一員是年裁

忻城縣流官留土官知縣掌縣事亦從廷瓚奏也十二

年韋祖鎰率兵五千助思恩岑濬攻田州殺掠男女八

百餘人驅之溺水死者無算副總兵歐磐詣田州兵乃

解嘉靖二十七年那地州土官羅廷鳳聽調有勞命襲

替免赴京四十二年錄平徭功授東蘭州那地州土官

職慶遠領州四河池弘治中以縣陞州改流官其東蘭

那地南丹皆土官縣五忻城土官又長官司二曰永順

曰永安 東蘭州在府城西南四百二十里宋有韋君

朝者居文蘭峒為蠻長傳子宴開崇寧五年內附因置
蘭州以宴開知州事俾世其官元改為東蘭州韋氏世
襲如故洪武十二年土官韋富撓遣家人韋錢保詣闕
上元所授印貢方物錢保匿富撓名以己名上因以錢
保知東蘭州既而錢保徵斂暴急民不堪命擁富撓作
亂廣西都司討平之執錢保正其罪仍以其地歸韋氏
那地州在府城西南二百四十里宋熙寧初土人羅

世念來降授世職崇寧五年諸蠻納土遂置地那二州以羅氏世知地州大觀中析地州置孚州元仍為地那二州洪武元年土官羅黃貌歸附詔并那八地為那地州予印授黃貌世襲土知州以流官吏目佐之南丹州宋開寶初土官莫洪臘內附元豐三年置南丹州管轄諸蠻歷世承襲元至正末莫國麒納土命為慶遠南丹谿洞安撫使明洪武初安撫使莫天護歸附七年置州授莫金知州世襲佐以流官吏目金以叛誅廢州置

衛後因其地多瘴遷之賓州既而變民作亂復置土官

知州以金子莫祿為之忻州宋慶歷間置縣隸宜州

元以土官莫保為八仙屯千戶洪武初設流官知縣罷

管兵官籍其屯兵為民莫氏遂徙居忻城界宣正後徭

獠狂悖知縣蘇寬不任職徭老韋公泰等舉莫保之孫

誠敬為土官寬為請於上官具奏得世襲知縣由是邑

有二令權不相統流官握空印僦居府城而已弘治間

總督鄧廷瓚奏革流官土人韋保為內官陰主之始獨

任土官 永順司永定司舊為宜山縣正統六年因蠻

民弗靖有司莫能控禦耆民黃祖記與思恩土官岑瑛
交結欲割地歸之思恩因謀於知縣朱斌備時瑛方雄
兩江大將多右之斌備亦欲藉以自固遂為具奏以地
改屬思恩土民不服韋萬秀以復地為名因而倡亂成
化二十二年覃召管等復亂屢征不靖弘治元年委官
撫之衆願取前地別立長官司都御史鄧廷瓚為奏置
永順永定二司各設長官一副長官一以鄧文茂等四

人為之皆宜山洛口洛東諸里人也自是宜山東南棄一百八十四村地宜山西南棄一百二十四村地議者以忻城自唐宋內屬已二百餘年一旦舉而棄之於蠻為失策云 永安長官司弘治九年九月析天河縣置平樂初為縣元大德中改平樂府明因之洪武二十一年廣西都指揮使言平樂府富川縣靈亭山破紙山等洞徭二千餘人占耕內地嘯聚劫奪居民被擾恭城賀縣及湖廣道州永明等縣之民亦被害比調衛兵收捕

即逃匿巖谷兵退復肆跳梁臣等欲於秋成時統所部
會永道諸軍列屯賊境扼其要路收其所種穀粟彼無
糧食勢必自窮乘機禽戮可絕後患從之二十九年遷
富川縣於富川千戶所時富川千戶所新立於靄石城
典史言縣治無城恐蠻寇竊發無以守禦宜遷城內為
便從之弘治九年總督鄧廷瓚言平樂府之昭平堡介
在梧州平樂間猺獞率出為患乞令上林土知縣黃瓊
歸德土知州黃通各選子弟一人領土兵各千人往駐

其地仍築城垣設長官司署領撥平樂縣仙回峒閒田
與之耕種其冠帶千夫長龍彪改授昭平巡檢造哨船
三十使往來府江巡哨流官停選廷議以昭平堡係內
地若增土官恐貽後患況府江一帶近已設按察司副
使一員整飭兵備土官不必差遣止令每歲各出土兵
一千聽調詔從其議府江有兩岸三洞諸獐皆屬荔浦
延袤千餘里中間巢峒盤絡為獐獐窟穴江上諸賊倚
為黨援日與府江酋長楊公滿等掠荔浦平樂及峰門

南源執永安知州楊惟執殺指揮胡翰千戶周濂土舍
岑文及兵民無算而遷江之北三來賓之北五皆右江
獐亦時與東歐西里及三都五都諸賊相倚附馬多人
勁俗號為剗馬賊常陳兵走嶺東掠三水清遠諸縣還
入南寧平南武宣來賓藤貴劫府庫已而劫來賓所千
戶黃元舉殺土吏黃勝及其子四人兵七十餘人又殺
明經諸生王朝經周松李茂姜集等白晝劫殺道絕行
人隆慶六年巡撫郭應聘總督殷正茂請討詔總兵官

李錫督軍進勦并調東蘭龍英泗城南丹歸順諸土兵
而以土吏韋文明等統之攻古西巖口笋山古造及兩
峰黃洞等寨斬獲賊渠餘黨竄入仙回古帶諸山搜捕
殆盡乃移檄北三北五趣其歸降峒老韋法真同被擄
來賓遷江民蒙演等詣軍前乞降許之乃定善後六策
以聞初荔浦之峰門南源修仁之麗壁永安之古眉諸
巡司為諸獍所奪至是議改土巡檢推擇有才武者給
冠帶管事三載稱職始世襲萬歷六年北山蠻譚公柄

挾毒弩肆傷行旅每一出十百為羣自殺黃勝後復聚
黨以三千人出公鳳山龜鼈塘與河塘韋宋武傍江結
寨時義寧永寧永福諸獍羣起相殺掠道路不通會叻
咳寨藍公潯執土吏黃如金奪其司巡撫吳文華檄守
巡道吳善陳俊徵永順白山兵及狼兵勦之平橫山叻
咳諸巢諸徭請還侵地及所擄生口願輸賦為良民遂
班師右江十寨隆慶中總督殷正茂擊破古田即以檄
趣八寨歸降得貸死於是寨老樊公懸韋公良等踵軍

門上謁自言十寨共一百二十八村環村而居者二千一百二十餘家皆請受賦右江兵備鄭一龍參將王世科謂十寨既請為氓當以十家為率賦米一石村立一甲長寨立一峒老為徵賦計而以思古周安落紅古卯龍哈立一州屬向武土官黃九疇羅墨古鉢古憑都北哱咳立一州屬那地土官黃暘皆為土知州已移思恩守備於周安堡而布政使以為不便正茂乃議立八寨為長官司以兵八千人屬黃暘為長官黃昌韋富皆給

冠帶為土舍亦各引兵二百守焉久之十寨復聚黨作
亂據民田產白晝入都市剽掠甚至攻城劫庫戕官民
總制劉堯誨巡撫張任急統兵進勦斬首一萬六千九
百有奇獲器仗三千二百牛馬二百三十九帝乃陞賞
諸土吏功復分八寨為三鎮各建一城而以東蘭州韋
應鯤韋顯能及田州黃馮克為土巡檢留兵一千人戍
之於三里增建二堡自楊渡水為界墾田屯種給南丹
衛通道慶遠賓州使思恩三里聯絡不絕於是右江十

寨復安輯輸賦三十二年桂林平樂猺獞據險肆亂殺
知縣張士毅焚劫無虛月總督應檣檄總兵官顧震督
兵進勦禽斬四百八十四俘獲男女三百四十牛馬器
械甚衆守臣以捷聞並上僉事茅坤叅將王寵都指揮
鍾坤秀叅政張謙百戶吳通等功狀各陞廕有差平樂
界桂梧西北近楚清湘九嶷鬱相膠結東南入梧溪洞
林箐多為猺人盤據自數經大征後刊山通道展為周
行而又增置樓船繕修校壘居民行旅皆帖席猺獞亦

駸駸馴習於文治云

梧州漢之蒼梧郡也元至元中改置梧州路洪武元年
征南將軍廖永忠叅將朱亮祖等既平廣東引兵至梧
州境元達嚕噶齊拜住率官吏父老迎降亮祖駐兵藤
州於是潯貴等州縣以次降附二年併南流縣於鬱林
州普寧縣於容州并藤州皆隸梧州府四年置梧州守
禦千戶所二十三年置容縣守禦千戶所廣西全省惟
蒼梧一道無土司徭患亦稀萬歷初岑溪有潘積善者

僭號平天王與六十三山六山七山諸猺獞據山為寇
居民請勦會大兵征羅旁不暇及總制凌雲翼檄以禍
福積善願歸降輸賦乃貸其死且以其子入學議者謂
七山為蒼藤信地六山為容縣北流中衝北科為六十
三山咽喉懷集為賀縣諸村出入之所因立五大營營
六百人合得三千人設叅將及屯堡三十治焉而懷集
猺賊在正德中已雄據十五寨環二百餘里為州縣患
官軍屢討之歸降然盤互如故往往相結諸峒蠻劫掠

殺百戶朱裳及把總羅定朝村民畏之東西走匿都御史吳善檄總兵戚繼光徵兵於羅定泗城都康諸土司分五道命叅將戴應麟等擊金鵝松柏諸寨斬渠魁撫四百餘人時鬱林徭亦桀驁數糾諸生徭破諸村寨入寇興業縣兵巡道副使王原相告於總制調兵擊破之諸徭悉平

潯州江曰潯江東城門曰潯陽郡名取焉洪武八年潯州大藤峽徭賊竊發柳州衛官軍禽捕之二十年知府

沈信言府境接連柳象梧藤等州山谿險峻猺賊出沒不常近者廣西布政司叅議楊敬恭為大亨老鼠羅淥山生猺所殺官軍討之賊登巖攀樹捷如猿狖追襲不及若久駐兵則瘴癘時發兵多疾疫又難進取兵退復出為患臣以為桂平平南二縣舊附猺民皆便習弓弩慣歷險阻若選其少壯千餘人免其差徭給以軍器衣裝俾各團村寨置烽火與官兵相為聲援協同捕逐可以殲之帝以蠻夷梗化夙昔固然但當謹其防禦使不

為患如為寇不已則發兵討之何必團寨永樂三年總兵韓觀奏桂平縣蠻民為亂請發兵勦捕帝命姑撫之勿用兵宣德四年總兵山雲討潯柳二州寇並誅從寇二千四百八十人梟首境上七年雲奏斬獲桂平等縣蠻寇覃公專等首級數帝顧左右曰蠻寇害我良民譬之蝨賊害稼不可不去然殺之過多亦所不忍雖彼自取滅亡朕自以天地之心為心也九年雲奏潯州等處蠻寇劫掠良民指揮田真率兵於大藤峽等處前後斬

首九十六級歸所掠男婦二百三人正統元年兵部尚書王驥奏桂平大藤峽等處蠻寇攻劫鄉村因調廣東官軍二千人今已逾年軍器衣裝損壞宜如貴州諸軍例予踐更從之二年山雲奏潯州府平南等縣耆民言大藤峽等山猺寇不時出沒劫掠居民阻絕行旅近山荒田為賊占耕而左右兩江人多食少其狼兵素勇為賊所憚若選委頭目屯種近山荒田斷賊出沒之路不過數年賊徒坐困地方寧靖矣臣已會同巡按諸司計

議量撥田州等府族目土兵分界耕守即委土官都指揮黃竑領之遇賊出沒協同勦殺從之七年猺賊藍受貳等恃所居大藤峽山險糾集大信等山山老山丁數百人遞年殺掠千戶潘智等誘執十人帝命梟之家口給賜有功之家十一年大藤峽蠻賊流劫鄉村侵犯諸縣巡按萬節以聞景泰七年大藤峽賊糾合荔浦等處賊劫掠縣治殺擄居民命總兵柳溥等勦之天順五年鎮守廣東中官阮隨奏大藤峽猺賊出沒兩廣為惡累

年邇來愈甚雖常會兵勦捕緣地里遼遠且兩廣軍馬不相統屬未易成功宜大舉擣其巢穴庶絕民患乃命都督僉事顏彪佩征蠻將軍印調南京江西及直隸九江等衛官軍一萬隸之六年彪奏臣率軍進勦大藤攻破七百二十一寨斬首三千二百七十一級復所掠男婦五百餘口帝敕獎之七年大藤峽賊夜入梧州城時總兵官泰寧侯陳涇駐兵城中會太監朱祥巡按吳璘副使周璫僉事董應軫叅議陸禎都指揮杜衡土官都

指揮岑瑛等議調兵夜半賊駕梯上城涇等不覺遂入府治劫庫放囚殺死軍民無算大掠城中執副使周璫為質殺訓導任璩涇等倉卒無計惟擁兵自衛隨軍器械并備賞銀物皆為賊有布政使宋欽時致仕家居挺身出以大義諭賊為所害黎明賊聲言官軍若動則殺周副使涇等乃遣人與賊講解晡時縱之出城賊既出乃縱璫還時官軍數千賊僅七百而已都指揮邢斌奏至帝曰梧州蕞爾小城總兵鎮巡三司俱擁重兵駐城

中乃為小賊所蔑視況遇大敵乎爾兵部其即議處行
八年國子監生封登奏潯州夾江諸山哈呀截葉峽中
有大藤如斗延亘兩崖勢如徒杠蠻衆蟻渡號大藤峽
最險惡地亦最高登藤峽巔數百里皆歷歷目前軍旅
之聚散往來可顧盼盡諸蠻倚為奧區桂平大宣鄉崇
姜里為前庭象州東鄉武宣北鄉為後戶藤縣五屯障
其左貴縣龍山據其右若兩臂然峽北巖峒以百計仙
人關九層崖極險峻峽以南有牛腸大岵諸村皆緣江

立寨藤峽府江之間為力山力山之險倍於藤峽又南
則為府江其中多冥巖奧谷絕壁層崖十步九折失足
隕身中產猺人藍胡侯槃四姓為渠魁力山又有獐人
善傳毒藥弩矢中人無不立斃四姓猺亦憚之自景泰
以來嘯聚至萬人隳城殺吏而修仁荔浦平樂力山諸
猺應之其勢益張渠長侯大狗嘗懸千金購莫能得鬱
林博白新會信宜興安馬平來賓亦煽動所至坵墟為
民害乞選良將多調官軍狼兵急滅賊報聞成化元年

編修邱濬條上兩廣用兵機宜兵部尚書王竑奏言峽賊稱亂日久皆由守臣以招撫為功致釀大患非大創不止因薦浙江叅政韓雍有文武才命以雍為僉都御史都督同知趙輔為征蠻將軍和勇為遊擊將軍率師討之時大藤峽賊三千餘陷南平縣殺典史周誠擄其妻子并劫縣印又入藤縣城掠官庫劫縣印鎮守總兵歐信以聞於是總兵官趙輔率軍至奏言大藤蠻賊以修仁荔浦為羽翼今大軍壓境宜先勦之乃合諸軍十

六萬人分五道進先破修仁窮追至力山生禽千二百
餘人斬首七千三百餘級二年趙輔韓雍等奏元年十
一月師次潯州謀深入以覆其巢遂調總兵官歐信等
分兵五哨取道山北以進臣及指揮白全分兵八哨直
抵潯州以擣山南復令叅將孫震分兵二哨從水路入
別遣指揮潘鐸等以兵分守諸山隘口剋期十二月朔
日水陸並進腹背交攻賊知師至先移妻子錢米入桂
州橫石塘等處藏匿乃於山南各寨立柵自固用木石

鏢鎗藥弩憑險拒守官軍用團牌扒山虎等器魚貫而進士殊死戰一日之間攻破山南石門林峒沙田古營諸巢縱火焚其積聚賊皆奔潰復督兵追躡剷山開路直抵橫石塘及九層樓等山賊已據險立柵數重復用木石鎗弩拒守臣等多設疑兵誘賊拋擲木石幾盡別遣壯士於賊所不備處高山絕頂舉礮為號諸軍緣木攀蘿蟻附而上四面夾攻連日鏖戰賊不支破寨三百二十四所斬首三千二百七級生禽侯大狗等七百八

十二人獲婦女二千七百一十八人戰溺死者不勝計
已將大藤峽改為斷藤峽刻石紀之以昭天討捷聞帝
降敕褒諭仍敕輔計議長策永絕後患未幾雍奏斷藤
峽殘賊侯鄭昂等七百餘人夜入潯州府城焚軍營城
樓奪百戶所印三顆殺掠男婦數十人旋為叅將孫震
指揮張英率軍擊斬賊魁餘黨仍奔入巢既雍又奏諸
徭之性憚見官吏攝以流官終難靖亂請改設武宣縣
東鄉等巡檢司以土人李昇等為副巡檢設武靖州於

峽內以上隆州知州岑鐸知州事土人覃仲英世襲土
官吏目然府江東西兩岸大小桐江洛口與斷藤峽朦
朧三黃等處村巢接壤路道崎嶇聚衆劫掠終不能除
正德十一年總督陳金復督調兩廣官軍土兵分為六
大哨按察使宗璽布政使吳廷舉副總兵房閏鎮守太
監傅倫叅將牛桓都指揮魯宗貫王瑛將之水陸並進
斬七千五百六十餘級金謂諸蠻利魚鹽耳乃與約商
船入峽者計船大小給之魚鹽蠻就水濱受去如榷稅

然不得為梗蠻初獲利聽約道頗通金以此法可久易
峽名永通諸蠻緣此無忌大肆掠奪稍不愜即殺之因
循猖獗江路為斷時總督王守仁定田州還兩江父老
遮道言峽賊阻害狀守仁上疏請討報可守仁率湖南
兵至南寧約日會兵寇聞湖兵且至皆逃匿守仁故為
散遣諸兵狀寇弛不為備乃令官軍突進連破油磑石
壁大皮等寨賊奔斷藤峽復追擊破之賊奔渡橫水江
溺死六百餘人俘斬甚衆賊潰散遂移兵仙臺花相白

竹古陶羅鳳諸處賊不支奔入永安力山官軍次第破之禽斬三千餘俘獲無算八寨平兩江悉定守仁遂以土官岑猛子邦佐為武靖知州使靖遺孽邦佐不能輯衆且貪得賊賄峽北賊復獫狁有侯勝海者為首指揮潘翰臣誘殺之勝海弟公丁聚衆譟城下僉事鄔閔參議孫繼武言於都御史潘旦請討之叅將沈希儀以為宜需春江漲順流下乃可破賊不聽閔與繼武以千人往擊賊遁斬一尫寇還漫言賊退請置堡堡成閔令土目

黃貴韋香以三百人往戍初貴香利勝海田廬故說翰
臣殺海至是往戍遂奪勝海田廬於是諸徭俱恚邦佐
又陰黨之公丁遂嘯聚二千餘人乘夜陷堡城殺戍兵
二百人貴香走免巡按以聞乃罷閱與繼武旦亦代去
命侍郎蔡經督兵討之會朝議欲征安南事遂已公丁
等益橫時出殺掠久之經乃會安遠侯柳珣決計發兵
以兵事屬副使翁萬達萬達廉得百戶許雄通賊狀詰
之雄懼請自効萬達佯庇公丁捕繫訐訟公丁者數人

公丁果遣人自列萬達佯許之又令雄假稱貸為賄公
丁喜益信雄會萬達巡他郡以事屬叅議田汝成汝成
召雄申飭之雄給公丁詣汝成自列言寇堡事由他徭
汝成亦慰遣之乃密授意城中居民被賊害者家出毆
公丁一市皆譁遊檄并逮公丁入繫獄遣雄諭其黨曰
寇堡事公丁委罪諸徭果否諸徭遂言事出公丁聽論
坐不敢黨乃檻致公丁於軍門磔之汝成因言於經謂
首惡既誅宜乘勢進兵討賊乃以副總兵張經都指揮

高乾分將左右二軍萬達及副使梁廷振監之副使蕭
畹紀功叅將林士元及汝成督餉嘉靖十八年二月兩
軍齊發左軍三萬五千人分六道攻紫荊石門梅嶺木
昂藤沖大坑等巢右軍萬六千人分四道攻碧灘羅渌
上中下洞等巢南北夾擊賊大窘遂擁衆奔林峒而東
王良輔邀擊之中斷復西奔諸軍合擊大破之斬首千
二百級追至羅連山又斬百餘級平南縣有小田羅應
古陶古思諸徭亦據險勿靖萬達等移兵勦之招降賊

黨二百餘人江南胡姓諸猺歸順者亦千餘人藤峽復
平隆慶三年右江諸猺獞復亂巡撫郭應聘請給餉勦
除給事中梁問孟以賊黨衆不可盡滅宜令守臣熟計
兵部言府江自正德十二年都御史陳金征討之後且
六十年而右江北三北五等巢素未懲創生齒日繁遂
肆猖獗頃者大征古田各巢咸畏威斂戢獨府江右江
恃險為亂若復縱之非惟無以固八寨懷遠之招亦恐
以啟古田攜貳之漸勦之便但兵在萬全宜即以科臣

所慮備行提督殷正茂及巡撫郭應聘等便宜行之應聘遂檄總兵官李錫等將兵往討以捷聞

南寧唐之邕州也元邕州路泰定中改南寧路洪武二年命潭州衛指揮同知邱廣為總兵官寶慶衛指揮僉事胡海廣西衛指揮僉事左君弼副之率兵討左江上思州蠻賊黃龍冠等龍冠一名英傑時聚衆萬餘寇鬱林州知州趙鑑同知王彬集民丁拒守賊圍半月不下海北等衛官軍來援賊夜遁追至上思州境破之賊走

還仍結聚不解事聞故命廣等討之廣等兵至上思州賊拒戰擊敗之禽從賊黃權等英傑走十萬山官軍追及斬之上思州平三年置南寧柳州二衛時廣西省臣言廣西地接雲南交趾所治皆溪洞苗蠻性很戾多畔府衛兵遠在靖江數百里外卒有警難相援乞立衛置兵以鎮又言廣海俗素獷戾動相讐殺蓋緣郡縣無兵以馭之近盜寇鬱林同知集民兵拒守潯州經歷徐成祖亦以民兵千餘敗賊是土兵未始不可用乞令邊境

郡縣輯民丁之壯者置衣甲器械籍之有司有事則捕賊無事則務農詔從之遂置衛益兵守禦賞王彬徐茂祖等有功者五年宣化盜起劫掠南寧府詔發廣西官軍討平之初南寧衛指揮僉事左君弼覈民之無籍者為軍又縱所部入山伐木民多擾遂相構為盜至是討平命大都督府按君弼罪南寧故稱邕管牂牁峙其西北交趾踞其西南三十六洞錯壤而居延袤幾千里橫山永平尤要害歷唐及宋建牙置帥與桂州等又郡地

夷曠可宿數萬師成化時征田州及經畧安南舉弭節
茲土後因徭蠻不靖往往仗狼兵急則藉為前驅緩則
檄為守禦諸徭乃稍稍驕恣不可盡繩以法議邕事者
謂宜開重鎮以復邕州督府之舊云南寧領州七曰新
寧橫州為流官歸德果化上思州下雷州忠州為土官
縣三宣化隆安永淳 歸德州宋熙寧中置元屬田州
路洪武二年土官黃隍城歸附授知州以流官吏目佐
之果化州宋始置元屬田州路洪武二年土官趙榮

歸附授世襲知州以流官吏目佐之洪熙元年果化州土官趙英遣族人趙誠等貢馬及方物弘治間州與歸德皆為田州所侵削因改隸於南寧上思州唐始置元屬思明路洪武初土官黃中榮內附授知州子孫畔服不常弘治十八年改流官屬南寧府正德六年土目黃錨聚衆攻城都御史林廷選捕之下獄已越獄復叛官軍禦之詐降攻破州城復捕獲之伏誅嘉靖元年都御史張嶺言上思州本土官後改流遂致土人稱亂宜

仍其舊擇土吏之良者任之議以為然仍以土官襲

下雷州宋置明初印失廢為峒在湖潤寨屬鎮安府峒

長許永通奉調有功給冠帶傳世烈國仁繼襲峒事嘉

靖十四年獲舊印國仁及子宗蔭屢立戰功四十三年

改屬南寧府萬歷十八年以地逼交南奏陞為州頒印

授宗蔭子應珪為土判官流官吏目佐之忠州宋始

置屬邕州左江道元屬思明路明初屬思明府隆慶三

年改屬南寧府

明史卷三百十七

欽定四庫全書

明史卷三百十七考證

桂林傳提督吳桂芳因其間遣典史廖元入上六里撫
論之

臣

章宗瀛按是時桂芳奏古田自弘正來知

縣未嘗入城今廖元撫賊有功宜陞主簿徐擢為知
縣且本省總兵止以都指揮統之不兼制柳慶權輕
位下凡事輒為撫司道所制請稍重將權部議加都
督銜兼制柳慶廖元陞擢皆如議見明實錄謹附識

桂林傳提督吳桂芳豹并其子扶枝膠送京師

臣章

宗瀛按是時僉事金柱捕得銀豹正茂因自劾詔勿問見明實錄謹附識

桂林傳更陞古田縣為永寧州

臣章宗瀛按地理志

一統志稱古田縣之為永寧州也在隆慶五年三月

謹附識

平樂傳平樂初為縣

臣章宗瀛按平樂漢屬蒼梧郡

地三國吳置縣歷晉至隋皆因之唐武德四年為樂

州旋改昭州天寶初曰平樂郡後復曰昭州宋曰昭州平樂郡見一統志傳僅稱天寶初為未詳核謹附考

平樂傳府江有南岍三洞諸獍皆屬荔浦延袤千餘里

臣章宗瀛按正德十三年五月都御史陳金奏府

江為兩廣舟船必由之路苗賊出沒江道阻塞請于昭平堡創建守備署移守備平樂居之摘撥廣東各衛所官軍二哨並桂平梧柳民兵三四千更番防

守又調柳慶士民田州土兵三四千人耕種沿江荒
田從之見明實錄謹附識

平樂傳乃定善後六策以聞
臣章宗瀛按所定善後
六策明實錄諸書均無考謹識

平樂傳荔浦之峯門南源修仁之麗壁永安之古眉諸
巡司
臣章宗瀛按峰門巡檢後遷中洞南源巡檢
後遷下洞又遷延賓江見一統志謹附識

潯州傳命以雍為僉都御史都督同知趙輔為征蠻將

軍 臣章宗瀛按是時趙輔亦王竑所薦見明紀事

本末謹附識

潯州傳嘉靖十八年二月兩軍齊發 臣章宗瀛按萬

達之追賊羅連山也檄右軍抵長洲沿江繞出賊背

賊于諸險隘仗器械防禦官軍以計發之追斬百餘

級會右軍迷失道愆期三日又土目盧蘇受賊賄斂

兵縱之而羅連亦官軍古所未至者賊深入山遂不

復窮追云見明實錄謹附識

潯州傳籐峽復平

臣章宗瀛按籐甲復平之後萬達

汝成獻善後七事於蔡經一編保甲以處新民二立

營堡以通江道三設多備以控上游四改州治以建

田五請狼田以正疆界六處款兵以慎邊防七推

商稅以資公費經為奏行之見明實錄謹附識

明史卷三百十七考證



總校官編修臣吳紹濬

欽定四庫全書薈要

史部

明史卷三百十八

九



詳校官中書臣劉源溥

欽定四庫全書蒼要卷六千九百十一

史部

明史卷三百十八

大學士張廷玉等奉 敕修

列傳第二百六

廣西土司二

太平

思明

思恩

鎮安

田州

恩城

上隆

都康

太平漢屬交趾號麗江唐為羈縻州隸邕州都督府宋
平嶺南於左右二江溪峒立五寨其一曰太平與古萬
遷隆永平橫山四寨各領州縣峒屬邕州建武軍節度
元仍為五寨後廢乃置太平路於麗江洪武元年征南
將軍廖永忠下廣西左江太平土官黃英衍等遣使齎
印詣平章楊璟降璟還自廣海帝問黃岑二氏所轄情
形璟言蠻獠頑獷散則為民聚則為盜難以文治當臨

之以兵彼始畏服帝曰蠻犛性習雖殊然其好生惡死之心未嘗不同若撫之以安靖待之以誠諭之以理彼豈有不從化者哉遣中書照磨蘭以權齎詔往諭左右兩江溪峒官民曰朕惟武功以定天下文德以化遠人此古先哲王威德並施遐邇咸服者也睦茲兩江地邊南徼風俗質樸自唐宋以來黃岑二氏代居其間世亂則保境土世治則修職貢良由其審時知幾故能若此頃者朕命將南征八閩克靖兩廣平定爾等不煩師旅

奉印來歸嚮慕之誠良足嘉尚今特遣使往諭爾其克
慎乃心益懋厥職宣布朕意以安居民以權至廣西衛
鎮撫彭宗萬戶劉維善以兵護送將抵兩江適來賓洞
蠻寇掠楊家寨居民以權謂彭宗等曰奉詔遠來欲以
安民今見賊不擊何以庇民乃督宗等擊之賊敗走遂
安輯其地兩江之民由是懾服二年黃英衍遣使奉表
貢馬乃改為太平府以英衍為知府世襲宣德元年崇
善縣土知縣趙暹謀廣地界遂招納亡叛攻左州執故

土官奪其印殺其母大肆擄掠占據村峒四十餘所造火器建旗幟僭稱王署偽官流劫州縣事聞帝命總兵官顧興祖會廣西三司勦捕興祖等招之不服遣千戶胡廣率兵進逼扼寨拒守廣進圍之紿出所奪各州印撫諭脇從官民使復職業暹計窮從間道遁伏兵邀擊及其黨皆就禽時左州土官黃榮亦奏蠻人李圓英劫掠居民偽稱官爵乞發兵勦捕帝謂兵部曰蠻民愚獷或挾私讐忿爭戕殺來告者必欲深致其罪未可遽信

其令鎮遠侯并廣西三司勘實先遣人招撫如叛逆果彰發兵未晚也三年斬南寧百戶許善初善知趙暹謀逆與之交通及總兵官遣善追暹又受暹馬十匹銀百兩故延緩之冀幸免事覺下御史鞠問得實斬之餘黨皆伏誅太平領州縣以十數明初皆以世職授土官而設流官佐之 太平州舊名瓠陽為西原農峒地唐為波州宋隸太平寨元隸太平路洪武元年土官李以忠歸附授世襲知州設流官吏目佐之 鎮遠州舊名古

隴宋置隸邕州元隸太平路洪武初土官趙勝昌歸附授世襲知州設流官吏目佐之 茗盈州宋置隸邕州元隸太平路洪武初土官李鐵釘歸附授世襲知州設流官吏目佐之 安平州舊名安山亦西原農峒地唐置波州宋析為安平州元隸太平路洪武初土官李郭佑歸附授世襲知州設流官吏目佐之 思同州舊名永寧為西原地唐置隸邕州元隸太平路洪武元年土官黃克嗣歸附授世襲知州設流官吏目佐之屬太平

府萬歷二十八年省入永康州 養利州元屬太平路

洪武初土官趙日泰歸附授知州以次傳襲宣德三年

其裔趙文安侵掠隣境七年討平之改流官 萬承州

舊名萬陽唐置萬承萬形二州宋省萬形隸太平寨元

隸太平路洪武初土官許郭安歸附授世襲知州設流

官吏目佐之永樂間郭安從征交趾死於軍子永誠襲

全茗州舊名連岡為西原地宋置隸邕州元隸太平

路洪武初土官李添慶歸附授世襲知州設流官吏目

佐之 結安州舊名營州亦西原農峒地宋置結安峒
隸太平寨元改州屬太平路洪武元年土官張仕榮歸
附授世襲知州設流官吏目佐之 龍英州舊名英山

宋為峒元改州屬太平路洪武元年土官李世賢歸附
授世襲知州割上懷地益其境設流官吏目佐之 結

倫州舊名那兜亦西原農峒地宋屬結安峒隸太平寨
元改州屬太平路洪武初峒長馮萬傑歸附授世襲知
州設流官吏目佐之 都結州元屬太平路土官農姓

洪武初內附授世襲知州設流官吏目佐之 上下凍

州舊名凍江宋置凍州元分上下凍二州尋合為一屬

龍州萬戶府洪武元年土官趙貼從歸附授世襲知州

設流官吏目佐之屬太平府貼從死子福瑀襲永樂四

年從征交趾死於軍 思城州亦西原農峒地唐置州

宋分為上下思城二州隸太平寨元至正間并為一屬

太平路洪武元年土官趙雄傑歸附授世襲知州設流

官吏目佐之 永康州宋置縣隸遷隆寨元隸太平路

土官楊姓成化八年其裔孫楊雄傑糾合峒賊二千餘人入宣化縣劫掠且偽署官職總兵官趙輔誅之因改流官萬歷二十八年升為州 左州舊名左陽唐置隸邕州宋隸古萬寨元屬太平路洪武初土官黃勝爵歸附授世襲知州再傳子孫爭襲相仇殺成化十三年改流官 羅陽縣舊名福利陀陵縣舊名駱陀皆宋置元隸太平洪武初土官黃宣黃富歸附並授世襲知縣設流官典史佐之

思明唐置州隸邕州宋隸太平寨元改思明路洪武初

改為府二年土官黃忽都遣使貢馬及方物詔以忽都

為思明府知府世襲十五年忽都復遣其弟祿政奉表

來貢詔賜鈔錠二十三年忽都子黃廣平遣思州知州

黃志銘率屬部偕十五州土官李圓泰等來朝明年廣

平以服闋遣知州黃忠奉表貢馬及方物詔廣平襲職

賜冠帶襲衣及文綺十匹鈔百錠二十五年憑祥洞巡

檢高祥奏思明州知州門三貴謀殺思明府知府黃廣

平廣平覺而殺之乃以病死聞於朝所言不實詔逮廣平鞠之既至帝謂刑部曰蠻寇相殺性習固然獨廣平不以實言故繩以法今姑宥之使其改過命給道里費遣還是後朝貢如例二十九年土官黃廣成遣使入貢因奏言本府自故元改思明路軍民總管府所轄江路州縣峒寨東至上思州南至銅柱元兵征交趾去銅柱百里設永平寨軍民萬戶府置兵戍守命交人供其軍餉元季擾亂交人以兵攻破永平寨遂越銅柱二百

餘里侵奪思明屬地邱溫如熬慶遠淵脫等五縣逼民附之以是五縣歲賦皆土官代輸前者本府失理於朝遂致交人侵迫益甚及告禮部任尚書立站於洞登洞登實思明地而交趾乃稱屬銅柱界臣嘗具奏蒙朝廷遣刑部尚書楊靖覈其事建武志尚可考乞敕安南俾還舊封庶疆域復正歲賦不虛帝令戶部錄所奏遣行人陳誠呂讓往諭安南三十年誠讓至安南諭其王陳日焜令還思明地議論往復久而不決以譯者言不達

意復為書曉之安南終辯論不已出黃金二錠白金四錠及沈檀等香以賄誠却之安南復咨戶部無還地意廷臣議其抗命當誅帝曰蠻人怙頑不悛終必取禍姑待之永樂二年憑祥巡檢李昇言其地瀕安南百姓樂業生齒日繁請改為縣以便撫輯從之以昇為知縣設流官典史一員三年昇以新設縣治來朝貢馬及方物謝恩廣成奏安南侵奪其祿州西平州永平寨地請遣使諭還從之九年免思明稅糧以廣成言去秋雨水傷

稼也宣德元年思明賀天壽節奉表踰期禮部請罪之
帝以遠蠻既至母問土官知府黃瑯奏憑祥歲凶民饑
命發龍州官倉糧振之正統七年瑯遣使入貢九年貢
解毒藥味賜鈔錦景泰三年瑯致仕以子鈞襲瑯庶兄
都指揮琰欲殺鈞代以己子琰守備潯州託言徵兵思
明府令其子糾衆結營於府三十里外馳至府襲殺瑯
一家支解瑯及鈞甕葬後圍仍歸原寨明日乃入城詐
發哀遣人報琰捕賊以掩其迹方殺瑯時瑯僕福童得

免走憲司訴其事且以徵兵檄為證郡人亦言殺瑯一
者者珖父子也副總兵武毅以聞將逮治之珖自度禍
及乃謀迎合朝廷意遣千戶袁洪奏永固國本事請易
儲奏入帝曰此天下國家重事多官其會議以聞珖為
此舉衆皆驚愕謂必有受其賂而教之者或疑侍郎江
淵云事成珖得釋罪且進秩英宗復辟珖聞自殺帝命
發棺戮其屍其子震亦為都督韓雍捕誅成化十八年
土知府黃道奏所轄思明州土官孫黃義為族人黃紹

所殺乞發兵捕勦帝命兩廣守臣區處以聞弘治十年
況村賊黃紹侵占思明丹石下石三州復謀殺知府黃
道父子道妻趙氏累訴於朝且謂屢經委官勘問俱被
賂免乞發兵誅之十一年紹集衆數千人焚劫鄉村據
三州屢撫不下總鎮請發兵捕勦嘉靖四十一年以勦
平獍狔功命土官知州男黃承祖暫襲本職隆慶四年
忠州土官黃賢相等據南寧府屬四都地作亂永康典
史李材計誘其黨縛賢相以降萬歷十六年思明州土

官黃拱聖謀奪襲殺其母兄拱極等五人而思明知府黃承祖乘亂掠村寨為之援按臣請以拱聖及諸凶正法思明州改屬流府革承祖冠帶立功自贖而追其所掠更令族人黃恩護拱極妻許氏撫遺孤世延待其長官之三十二年總督戴耀奏思明叛目已禽土官黃應雷縱僕起釁棄印而逃斷難復官黃應宿爭地殺戮六哨成仇且係義子不應襲職黃應聘係承祖幼子人心推戴似應承襲知府以存黃氏宗祀但年甫七歲暫令

流官同知署府事待至十五歲交印接管應雷既廢不
宜同城應降為土舍其後永襲土舍給田養贍制其出
入應宿仍管故業俱屬思明府節制於府治設教授一
員量給廩生六名其寄附太平府者悉歸本學嗣後續
增其祭祀廩餼之用則地方可安文教可興詔悉從之
崇禎十一年總督張鏡心疏報土官殺職官思明州黃
日章黃德志等鼓衆叛逆帝令速禽首惡以靖地方論
者以黃琬神奸身追大盜世濟其兇傳及四世猶併思

明州而有之王綱隳矣然骨肉相屠至是四見蓋天道
云 思明州東抵思明府西抵交趾界南抵西平州北
抵龍英州土官黃姓與思明府同族洪武初黃君壽歸
附授世襲知州屬思明府後為黃瑄所并萬歷十六年
萬拱聖之亂改屬太平 上石西州宋屬永平寨元屬
思明路明初屬思明府至萬歷三十八年改屬太平府
州更土官趙氏何氏黃氏凡三姓皆絕始改流官 下
石西州宋分石西州置元屬思明路洪武二年土官閉

賢歸附授世襲知州設流官吏目佐之 忠州宋置隸

邕州元屬思明路洪武初土官黃威慶率子中謹歸附
授威慶江州知州中謹忠州知州皆世襲設流官同知
吏目佐之其隣地有四峒者界於南寧思明忠江之間
思明忠州屢肆侵奪副使翁萬達議改峒名四都隸之
南寧地方稍定隆慶三年冬思明府土官黃承祖奏取
四都地忠州土官黃賢相爭之遂擅立總管諸名目分
兵數千戍守因縱令剽掠為禍甚烈僉事譚惟鼎調永

康典史李材以計禽賢相斃之於獄議改流官不果遂
改隸州於南寧仍以州印予賢相子有瀚俾襲職憑
祥宋為憑祥峒屬永平寨元屬思明路洪武十八年土
蠻李昇歸附置憑祥鎮授昇巡檢屬思明府永樂二年
置縣以昇為知縣成化八年升為州以昇孫廣寧為知
州直隸布政司廣寧有十子廣寧死諸子爭立不決凡
三四年乃以孫珠襲知州職嘉靖十年珠死族弟珍珏
爭立珍挈印走況村珏攝州事十四年州目李清趙琪

等謀納珍許思明府黃朝以州屬之朝遂以兵納珍於
憑祥珏奔罄柳既珍悔屬思明與朝隙朝乃以外婦所
生子時芳說云廣寧孫以兵千人納之時珍淫縱為部
民所怨於是廣寧季子寰以尊屬謀廢立十七年寰遂
殺珍而附於安南莫登庸藉為嚮導總督張經屬副使
翁萬達禽之論死於是珏與時芳復爭立時芳倚思明
勢州民皆右之萬達黜珏而論時芳死更立李佛嗣珍
為知州憑祥遂定

思恩漢屬交趾唐為思恩州屬邕乃澄州止戈縣地宋開寶間廢澄州以止戈賀水無虞三縣省入上林治平間以上林之止戈入武緣隸邕元屬田州路歷代羈縻而已明洪武二十二年田州府知府岑堅遣其子思恩州知州永昌貢方物二十八年歸德州土官黃碧言思恩州知州岑永昌既匿五縣民不供賦稅仍用故元印章帝以不奉朝命命左都督楊文相機討之既以荒遠不問永樂初改屬布政司時居民僅八百戶永昌死子

瑛襲宣德二年瑛遣弟璫貢馬正統三年進瑛職為知府仍掌州事瑛有謀畧善治兵從征蠻寇屢有功故有是命因與知府岑紹交惡各具奏下總兵官及三司議於是安遠侯柳溥等請陞思恩為府俾瑛紹各守疆土以杜侵爭從之六年瑛受屬挾詐事覺帝以土蠻宥不問令法司移文戒之瑛以府治僻隘喬利堡正當猺寇出沒之所且有城垣公廨乞徙置許之以思恩府為思恩軍民府十二年設儒學置教授一員訓導四員俱從

瑛請也景泰四年總兵官陳旺奏思恩土兵調赴桂林
哨守者離本府遼遠不便耕種稅糧宜暫免從之六月
以瑛親率本部狼兵韋陳威等赴城操練協助軍威敕
授奉議大夫賜綵緞韋陳威等俱給冠帶五年從瑛請
建廟學造祭祀樂器又以瑛征勦猺寇功免土軍今年
應輸田糧之半進瑛從二品散官瑛屢領兵隨征以子
鑽代為知府鑽招集無賴肆為不法瑛舉發其事請於
總兵回府治之鑽聞其父將至自縊死事聞嘉其能割

愛効忠降敕慰諭又以柳溥奏免思恩調用土軍千五百人秋糧二千三百餘石天順元年戶部奏思恩存留廣西操練軍一千五百人有誤種田納糧乞分為三班留五百人操練免其糧七百七十餘石放回千人耕種徵其糧千五百四十餘石俟寧靖日放回全徵從之三年鎮守中官朱祥奏請量遷瑛都司軍職帝以瑛歷練老成累有軍功改授都指揮同知仍職總兵官鎮守調用以其子鏊為知府成化元年遣兵科給事中王秉彝

齋敕獎諭瑛父子并賜銀幣二年命給瑛父母妻誥命
從總兵趙輔請也十四年瑛卒瑛自襲父職頻年領兵
於外多所斬獲歷陞知府叅政都指揮使年且八十尚
在軍中既卒鏖以誥請帝念其勞特賜之十六年田州
府土目黃明作亂知府岑溥避入思恩鏖會鎮守等官
討平之總督朱英請獎鏖功鏖死子濬襲弘治十二年
田州土官岑溥為子獠所殺獠亦死次子猛幼頭目黃
驥李蠻構難督府命濬調衆護猛驥厚賂濬并獻其女

且約分地與濬濬以兵屬驥送猛至田州不得入猛遂
久留濬所及總鎮諸官攝濬乃出猛襲知府濬從索故
分地不得怒約泗城東蘭二州攻劫田州殺掠萬計城
郭為墟濬兵二萬據舊田州劫龍州印納故知府趙源
妻岑氏及總兵官詣田州勘治黃驥懼匿濬所先是濬
築石城於丹良莊屯兵千餘人截江道以括商利官命
毀之不聽會官軍自田州還乘便毀其城濬兵來拒殺
官軍二十餘人官軍敗之俘其目兵九人總鎮及巡按

等官請治濬罪而叅政武清納濬賂曲護之濬從弟業少從中官京師仕為大理寺副三司總鎮請敕業往諭兵部以濬稔惡非業所能諭責宜敕鎮巡召濬至軍門諭以朝廷威德罪其首惡反侵地納所劫印并官私財物乃可赦總督鄧廷瓚奏濬屢撫不服請調官軍土兵分哨逐捕按問如集兵拒敵相機勦殺并將田州土官岑猛一并區處以靖邊疆十六年總督潘蕃奏濬僭叛當用兵誅勦今濬從弟岑業以山東布政司叅議在內

閣制敕房辦事禁密之地恐有泄漏吏部擬改調而業
亦奏乞養去十七年濬掠上林武緣等縣死者不可勝
計又攻破田州猛僅以身免掠其家屬五十人總鎮以
聞兵部請調三廣兵勦之十八年總督潘蕃太監韋經
總兵毛銳調集兩廣湖廣官軍土兵十萬八千餘人分
六哨副總兵毛倫右叅政王璘由慶遠右叅將王震左
叅將王臣及湖廣都指揮官纓由柳州左叅將楊玉僉
事丁隆由武緣都指揮金堂副使姜綰由上林都指揮

何清叅議詹璽由丹良都指揮李銘泗城州土舍岑接
由工堯各取道共抵巢寨賊分兵阻險拒敵官軍奮勇
直前援崖而進濬勢蹙遜入舊城諸軍圍攻之濬死城
中人獻其首思恩遂平前後斬捕四千七百九十級俘
男女八百人得思恩府印二向武州印一自進兵及班
師僅踰月捷聞帝以蕃等有功璽書勞之兵部議濬既
伏誅不宜再錄其後改設流官擇其可者以雲南知府
張鳳陞廣西右叅政掌思恩府事賜敕正德七年增設

鳳化縣治時初設流官諸蠻未服相繼作亂嘉靖四年

都御史盛應期遣官軍平之六年土目王受與田州盧

蘇謀煽亂勢復熾新建伯王守仁受命至一意招撫而

檄受等破八寨賊因列思恩地為九土巡檢司管以頭

目授王受白山司巡檢得比於世官又以思恩舊治瘴

霧昏塞宜更之爽塏於是擇地荒田建新郡割武緣止

戈二里益之又議割上林三里而移鳳化縣治於其處

蓋寓犬牙相錯之意巡撫林富謂遷郡及割止戈里應

如守仁議至以三里當設衛而并鳳化縣裁之遂令府治益孤其後九司頭目日恣所轄蠻民不堪知府陳璜曲加綏戢目把劉觀盧回以復土為名鼓衆作亂副使翁萬達因有事安南計禽盧回殺之招回從亂者三十餘人最後東蘭岑瑄詐稱岑濬子起雲謀復土官為九司頭目所縛萬歷七年督撫吳文華謂九司日以驕黠編氓甚少緩急難恃奏割南寧武緣縣屬思恩自是思恩稱巨鎮云思恩府壬巡檢九司皆嘉靖七年設曰興

隆曰那馬曰白山曰定羅曰舊城曰下旺曰安定曰都陽曰古零

鎮安宋時於鎮安峒建右江軍民宣撫司元改鎮安路明洪武元年鎮安歸附以舊治僻遠移建廢凍州改為府授土官岑添保知府朝貢如例二十七年添保上言往者征南將軍傅友德令郡民歲輸米三千石運雲南普安衛鎮安僻處溪洞南接交趾孤立一方且無所屬州縣人民鮮少舟車不通陸行二十五日始到普安道

遠而險一夫負米三斗給食餘所存無幾往往以耕牛

及他物至其地易米輸納而普安荒遠米不易得民甚

病之又歲輸本衛米四百石尤極艱難舊以白金一兩

折納一石今願依前例以蘇民困從之永樂中向武知

州黃世鐵侵奪鎮安高寨等地朝廷遣兵討平之以其

地屬鎮安成化八年知府岑永壽姪宗紹糾集土兵攻

破府治殺傷嫡母流劫鄉村有司撫諭不服都指揮岑

瑛禽斬之嘉靖十四年田州盧蘇作亂糾歸順州土官

岑瓛攻毀鎮安府目兵遇害者以萬計按臣曾守約以聞帝命兩廣總督陶諧治之時蘇倡亂田州無主鎮安府土官男岑真實以兵納岑邦佐於田州歸順州岑瓛蘇壻也及向武州黃仲金皆與真實隙乘真實入田州蘇遣瓛及仲金襲破鎮安真實聞亂走還蘇會目兵追圍之武陵寨瓛等遂發真實父母墓焚其骸分兵占據諸峒寨真實訴之軍門督諭瓛等不退久之乃解官軍歸真實於是瓛與真實互相訐巡按御史言土蠻自相

讐非有所侵犯從末減於是蘇猷仲金各降罰有差真寶亦革冠帶許立功自贖二十二年以犛獐作亂防禦需人免真寶諸土官來朝鎮安所屬有上映洞湖濶寨巡檢皆土人世官

田州古百粵地漢屬交趾郡唐置田州隸邕州都督府宋因之屬邕州橫山寨元改置田州路軍民總管府明興改田州府省來安府入焉後改州領縣一曰上林洪武元年大兵下廣西右江田州府土官岑伯顏遣使齎

印詣平章楊璟降二年伯顏遣使奉表貢馬及方物詔以伯顏為田州知府世襲自是朝貢如制六年田州溪峒蠻賊竊發伯顏討平之伯顏請振安州順龍州侯州陽縣羅博州龍威寨人民詔有司各給牛米仍蠲其稅二年十六年伯顏死子堅襲十七年都指揮使耿良奏田州知府岑堅泗州知州岑善忠率其土兵討捕猺寇多樹功績臣欲令選取壯丁各五千人立二衛以善忠之子振堅之子永通為千戶統衆守禦且耕且戰此古

人以蠻攻蠻之術也詔行其言二十年堅遣子思恩知州永昌朝貢如例給賜永樂元年堅死子永通襲永通上隆州知州也州以瓊代而已襲父職正統八年賜知府岑紹誥命并封贈其父母妻天順元年田州頭目呂趙偽稱敵國大將軍張旗幟鳴鉦鼓率衆劫掠南丹州又據向武州武進伯朱瑛以聞兵部請命瑛及土官岑瑛勦捕三年巡撫葉盛奏田州叛目呂趙勢愈獗殺知府岑鑑占據地方偽稱太平王圖謀岑氏宗族冒襲知

府職事帝命總兵速討四年巡按御史吳禎奏奉敕勦捕反賊呂趙選調官軍土兵攻破功饒婪鳳二關直擣府城呂趙攜妻子挾知州岑鐸等宵遁官軍追至雲南富州奪回鐸等及其子若壻斬首四十九級賊衆悉降趙以數騎走鎮安府追及之斬趙及其子四人從賊十八人獲其妻孥及偽太平王木印無敵將軍銅印并鳳旗盔甲等物復委知府岑鏞仍掌府事撫安人民田州平帝遣使齎敕獎諭禎等并敕鏞謹守法度保全宗族

成化元年遣兵科給事中王秉彝齎敕諭鏞并賜銀幣以兵部言其所部土官狼兵屢調勦有勞且有事於大藤峽也二年總兵官趙輔奏鏞從征有功請給誥命旌其父母并妻從之五年復以輔言予鏞官誥十六年田州頭目黃明聚衆為亂知府岑溥走避思恩總督朱英調叅將馬義率軍捕明明敗走為恩城知州岑欽所執并族屬誅之已浦復與欽交惡欽攻奪田州逐溥殺五十餘家時泗城州岑應方恃兵強復黨欽殺擄人民二

萬六千餘與欽分割田州而據其地弘治三年總制遣官護溥之子猷入田為欽所遏居潯州按察使陶魯率官軍次南寧欽拒敵敗走而應復援之入城陳兵以備總督秦紘請合貴州湖廣及兩廣兵勦之欽勢蹙乞兵於應遂匿應所總鎮官因檄應捕欽欽從應飲殺應父子於坐收其兵以拒官軍已而應弟岑接佯以兵送欽至田州界亦殺其父子以報事聞廷議仍命溥還田州九年總督鄧廷瓚言溥前以罪革職比隨征有功乞復

其冠帶領土兵赴梧州聽調從之十二年溥為子獠所弑獠亦自殺次子猛方四歲溥母岑氏及頭目黃驥護之赴制府告襲歸至南寧頭目李蠻來迎驥慮蠻奪己權殺其使蠻率兵至舊田州驥懼誣蠻將為變乞以兵納乃調思恩岑濬率兵衛猛濬受驥賂納其女挾猛約分其六甲地比至田州蠻拒不納驥復以猛奔思恩幽之事覺廷瓚檄副總兵歐磐等攝濬久乃出猛置於會城得奏命猛襲知府驥濬怒其事之不由己出也要泗

城岑接東蘭韋祖鉉各起兵攻蠻接兵二萬先入田州殺掠男女八百餘人驅之溺水死者無算括府庫放兵大掠城郭為墟濬兵二萬攻舊田州據之殺掠男女五千三百餘人蠻逃去副總兵歐磐叅政武清等詣田州府勘治遣兵送猛還府驥懼罪匿濬家有司請治濬罪初蠻之迎猛也無他念及猛在外蠻守土以待其歸驥爭權首亂濬接祖鉉黨惡以致茲變清受濬賂曲右之且誣蠻占據府治阻兵弄權事竟不直於是廷瓚言思

恩岑濬罪惡正在逐捕而田州岑猛亦宜乘此區畫降
府為州毋基異日尾大之患從之十八年廷議以思田
既平宜設流官岑猛世濟兇惡致陷府治宜降授千戶
而遴選才望者假以方面職銜守田州仍賜敕以重其
權帝然之於是以平樂知府謝湖為右叅政掌府事時
岑猛已降福建平海衛千戶遷延不行及湖至復陳兵
自衛令祖母岑氏奏乞於廣西極邊率部下立功以便
祭養詔總鎮官詳議以聞總督陳金奏猛據舊巢要求

府佐不赴平海衛叅政謝湖不即赴任為猛所拒納餽遺而徇其要求宜逮問時猛遣人重賂劉瑾得旨留猛而褫湖并及前撫潘蕃劉大夏猛竟得以同知攝府事猛撫輯遺民兵復振稍復侵旁郡日廣嘗言督撫有調發願立功冀復舊職會江西盜起都御史陳金檄猛從征猛所至剽掠然以賊平故論功遷指揮同知非猛初意頗怨望正德十五年猛奏田州土兵每征調輒許戶留一二丁耕種以供常稅其久勞於外者乞量振給免

其輸稅從之嘉靖二年猛率兵攻泗城拔六寨遂克州

治岑接告急於軍門言猛無故興兵攻寨猛言接非岑氏後據其祖業欲得所侵地時方有上思州之役徵兵皆不至總督張嶺以狀聞四年提督盛應期巡按謝汝儀議大征猛條征調事宜詔報可而應期以他事去詔以都御史姚鏌代命懸金購猛然鏌知猛無反心猛方奏辯鏌亦欲緩師而巡按謝汝儀與鏌郤乃誣鏌之于涑納猛萬金廉得涑書獻之鏌惶恐乃再疏請征於是

部趣鎔剋期進鎔偕總兵官朱麟發兵八萬以都指揮
沈希儀張經等統之分道並入猛聞大兵至令其下毋
交兵裂帛書寃狀陳軍門乞憐察鎔不聽督兵益急沈
希儀斬猛長子邦彥於工堯隘猛懼謀出奔而歸順州
知州岑璋猛婦翁也其女失愛璋欲藉此報猛乃甘言
誘猛走歸順鳩殺之斬首以獻六年鎔以田州平告捷
京師乃請改田州為流官并陳善後七事詔俱從之鎔
留叅議汪必東僉事申會叅將張經以兵萬人鎮其地

知府王熊兆署府事會必東惠皆移疾他駐惟經熊兆
在府兵勢分防守稍懈於是逆黨盧蘇王受等乃為偽
印誑言猛在且借交趾兵二十萬以圖興復蠻民信之
聚衆薄府城經出擊兵少不敵欲引還而城中陰為內
應呼譟四出官軍腹背受攻力戰不支突圍渡江走賊
逼其後爭舟溺死者甚衆賊沿江置闌索伏藥弩夾岸
並起官軍且戰且行抵向武失士卒三四百人賊遂入
據府城燒倉粟以萬計御史石金上其事頗委罪前撫

盛應期生事召釁而給事中鄭自璧因請仍檄湖廣永順保靖兵併力勦賊帝以四方兵數萬方歸休豈可復調命再計機宜以聞時盧蘇等雖據府叛佯聽撫遣人迎署府事王熊兆而其黨王受等糾衆萬餘攻據思恩城執知府吳期英守備指揮門祖蔭等已而釋期英等亦投牒上官願聽招撫都御史姚鏌以兵未集姑受之以緩其謀遣諜者檄東蘭歸順鎮安泗城向武諸土官各勒兵自効且責失事守巡叅將等官立功自贖復疏

調湖廣永保土兵江西汀贛畬兵俱會於南寧併力進
勦帝以蠻亂日久鎮巡官受命大征未及殄絕輒奏捷
散兵使餘孽復滋罪不容逭姑赦前過益圖新功乃起
原任兵部尚書新建伯王守仁總督軍務同鎮討之時
受既入思恩封府庫以賊兵守之而自攻武緣守巡官
鄒輓等率兵至思恩思恩千夫長韋貴徐伍等遣壯士
由間道入城為內應夜引官兵奪門殺賊二十餘人收
府印及庫物護送期英於賓州因招撫城中未下者時

受攻武緣甚急叅將張經堅壁拒守鎮守頭目許用與戰斬其渠帥一人賊見援兵大集乃遁去鎔以聞帝以田州思恩賊鋒雖挫首惡未禽仍令守仁亟督兵勦撫守仁威名素重及督軍務調兵數萬人至諸蠻心懾守仁至南寧道中見受等勢盛度亦未可卒滅上疏極陳用兵利害兵部議以守仁所見朱確復陳五事令守仁詳計其宜於是守仁又疏云臣奉命於去年十二月至廣西平南縣與巡按御史石金及藩臬諸將領等會議

思田禍結兩省已踰二年今日必欲窮兵盡勦則有十
患若罷兵行撫則有十善臣與諸臣攄心極論今日之
局撫之為是臣至南寧遂下令盡撤調集防守之兵數
日內解歸者數萬惟湖兵數千道阻遠不易即歸仍使
分留南寧解甲休養待間而動而盧蘇王受先遣其頭
目黃富等訴告願得歸境投生乞宥一死臣等諭以朝
廷威德令齋飛牌歸巢曉諭期以速降無死蘇受等得
牌皆羅拜踴躍歡聲雷動尋率衆至南寧城下分屯四

營蘇受等囚首自縛與頭目數百人赴軍門請命臣等復諭之曰朝廷既赦爾罪爾等擁衆負固騷動一方若不示罰何以雪憤於是下蘇受於軍門各杖一百乃解其縛又諭之曰今日宥爾死者朝廷好生之德必杖爾者人臣執法之義衆皆叩首悅服願殺賊立功臣隨至其營撫定其衆七萬餘人復委布政使林富等安插於二月二十六日悉命歸業是皆皇上至孝達順之德神武不殺之威未期月而蠻民率服不折一矢不傷一人

而全活數萬生靈即古舞干之化奚以加焉疏聞帝嘉之遣行人齎敕獎賚於是守仁復疏言思田久構禍荼毒兩省已踰二年兵力盡於哨守民脂竭於轉輸官吏疲於奔走地方艱阨如破壞之舟漂泊風浪覆溺在目不待智者而知之矣必欲窮兵雪憤以殲一隅無論不克縱使克之患且不測況田州外捍交趾內屏各郡深山絕谷猺獠盤據使盡誅其人異日雖欲改土為流誰為編戶非惟自撤其藩籬而拓土開疆以資鄰敵非計

之得也今岑氏世効邊功猛獨註誤觸法雖未伏誅聞已病死臣謂治田州非岑氏不可請降田州府為田州而官其子以存岑氏之後查猛有二子長邦佐自幼出繼為武靖州知州武靖當猺賊之衝邦佐才足制馭宜仍舊職而今所建州請以猛幼子邦相授吏目署州事俟後遞陞為知州以承岑氏之祀設土巡檢諸司即以盧蘇王受等九人為之以殺其勢添設田寧府統以流官知府以總其權從之惟以守仁所奏岑猛子與撫按

所報異令再覆於是守仁言臣初議立岑氏後該府土
目及耆老俱言岑猛本有四子長邦佐妻張氏出次邦
彥妾林氏出次邦輔外婢所生次邦相妾韋氏出猛嬖
溺林氏而張失愛故邦佐自幼出繼武靖邦彥既死邦
佐得武靖民心更代亦難其人欲立邦輔土目謂外婢
所生名實不正惟邦相係猛正派質貌厚重堪繼岑氏
故當時直謂猛子存者二人亦所以正名慎始杜後日
之爭也疏上如議行八年守仁於思田既議設流官又

議移南丹衛於八寨改思恩府城於荒田改設鳳化縣
治於三里添設流官縣於思龍增築五鎮城堡於五屯
及侍郎林富繼之又言田州界居南寧泗城交通雲貴
交趾為備非一不宜改設流官南丹衛設在賓州既不
足以遙制八寨遷八寨又不得以還護賓州為今日計
獨上林之三里守仁所議設縣者可遷南丹衛於此夫
設縣則割賓州之地以益思恩是顧彼而失此也遷衛
則扼八寨之吭以還護賓州是一舉而兩得也然不宜

屬田州而仍屬南寧為便其議與守仁頗有異同詔從
富言初邦相兄邦彥有子芝依大母林氏瓦氏居官給
養田其後邦相惡蘇專擅密與頭目盧玉等謀誅蘇及
芝蘇知之會邦相又侵削二氏原食莊田二氏遂與蘇
合謀以芝奔梧州赴軍門告襲蘇又為芝疏請尋令人
刺邦相邦相覺殺行刺者而蘇遂伏兵殺盧玉等以兵
圍邦相宅誘邦相出乘夜與瓦氏縊殺之巡按御史曾
守約以聞帝命總督陶諧勘處蘇之殺邦相也歸順鎮

安泗城向武諸土官羣起構難互相訐奏當事者謂以
岑芝承襲未定田州無主致令隣封覬覦當給劄付令
芝管事蘇又請早給芝冠帶以撫田州而自悔罪願裏
糧立功及追補累年所逋糧賦巡按御史諸演䟽聞部
議以土蠻自相讐殺當從末減皆令立功方准贖罪復
官三十二年芝死于大壽方四歲土人莫葦冒岑姓及
土官岑施相煽構亂提督郎檟奏令思恩守備張啟元
暫駐田州鎮之報可三十四年田州土官婦瓦氏以狼

兵應調至蘇州勦倭隸於總兵俞大猷麾下以殺賊多
詔賞瓦氏及其孫男岑大壽大祿銀幣餘令軍門獎賞
四十二年以平廣西猺獞功准岑大祿實受知州職泰
昌元年總督許弘綱奏田州土官岑懋仁肆惡起釁窺
占上林納叛人黃得隆等糾衆破城擅殺土官黃德勲
擄其妻女印信乞正其罪詔令岑懋仁速獻印執送諸
犯聽按臣分別正法違則進勦天啟二年巡撫何士晉
請免懋仁逮問各率土兵援勦有功優敘從之田州世

岑氏改流者再而終不果盧蘇再叛弑主終逸於罰論者以為失刑云上林在田州東宋置隸橫山寨元屬田州路洪武二年土官黃嵩歸附授世襲知縣流官典史佐之

恩城州唐置宋元仍舊明初因之隸廣西布政司朝貢如例成化十九年知州岑欽田州土官岑溥叔也相讐殺溥敗欽入田州焚府治大肆殺掠溥愬於制府下三司官鞠理弘治三年欽復入田州與泗城土官岑應分

據其地巡撫秦紘請調兵勦之兵部言兵不可輕動惟令守臣諭令應縛欽自贖五年欽走岑應所借兵總鎮檄應捕之欽遂殺應父子已而應弟接伴以兵送欽亦殺欽父子有司以恩城宜裁革從之州遂廢

上隆州宋置隸橫山寨元屬田州路明因之後改隸布政司洪武十九年上隆知州岑永通遣從子岑安來貢賜綺帛鈔錠洪熙元年土官知州岑瓊母陳氏來朝貢馬賜鈔幣宣德四年以陳氏為知州時瓊已卒無子土

人訴於朝願得陳氏襲職故有是命

都康州宋置隸橫山寨元屬田州路洪武間為蠻獠所據建文元年復置隸布政司土官馮姓其界東南抵龍英西至鎮安北至向武

欽定四庫全書

明史卷三百十八考證

太平府傳土官黃英衍等遣使齎印詣平章楊璟降

臣

章宗瀛按是時田州府土官岑伯顏與黃英衍同

賫印降見蠻司合志及田州傳謹附考

茗盈州傳土官李鐵釘歸附

臣

章宗瀛按李鐵釘統

志作李正英與此互異謹附考

思同州傳元隸太平路

臣

章宗瀛按思同州宋史屬

左江道不屬太平寨元時則屬太平路傳以為宋隸
太平寨者誤也謹據統志改其二十八年省入永康
統志作二十七年與此互異謹附識

養利州傳宣德三年其裔趙文安侵掠隣境七年討平
之臣章宗瀛按一統志宣德三年日泰裔趙文安
侵掠隣境伏辜七年置流官傳誤謹據改

全茗州傳土官李添慶歸附

臣章宗瀛按李添慶統

志作許添慶與此互異謹識

結安州傳舊名營州

臣

章宗瀛按舊名營州此誤州

為周謹據統志及土夷考改

龍英州傳土官李世賢歸附

臣

章宗瀛按李世賢統

志作趙世賢與此互異謹識

結倫州傳舊名那兜

臣

章宗瀛按舊名那兜此誤那

為邦謹據統志及土夷考改

結倫州傳宋屬結安峒

臣

章宗瀛按方輿紀要云結

倫州宋為結安峒地傳中脫去結字置字亦誤謹據

改並節去下文一字以符勾刻

都結州傳元屬太平路

臣

章宗瀛按都結州古名渠

望洪武初土官農威烈歸附見土夷考統志謹附考

思城州傳土官趙雄傑歸附

臣

章宗瀛按趙雄傑統

志作趙斗清與此互異謹識

永康州傳土官楊姓

臣

章宗瀛按土官楊姓楊榮賢

也見土夷考謹識

思明府傳黃瑛遣千戶袁洪奏永固國本事請易儲

臣章宗瀛按珙先遣人入京賂用事者請易儲景帝大悅命廷臣會議大學士陳循力主之遂易見濟為皇太子珙遂蒙大赦原免復職并進都督賜誥命見蠻司合志謹附考

上石西州傳宋屬永平

臣

章宗瀛按宋建五寨於左

右二江一名永平傳誤永為承謹據宋史改

憑祥州傳成化八年升為州

臣

章宗瀛按地理志作

成化十八年與此互異謹識

鎮安府傳帝命兩廣總督陶諧治之

臣章宗瀛按王

守仁卒於嘉靖八年此係十四年事何以命守仁治之是時陶諧總督兩廣謹據諧傳明實錄紀事本末改

田州府傳唐置田州

臣章宗瀛按新唐州田州開元

中開蠻洞則唐始置田州也此言宋始置誤謹據改並於下文節去數字以憑勾刻

田州府傳總督秦紘

臣章宗瀛按秦紘本傳紘時為

右都御史總督兩廣此云巡撫誤謹據改

田州府傳猯亦自殺

臣

章宗瀛按通鑑紀事言土目

黃驥李蠻發兵殺猯此云猯亦自殺與彼互異謹附考

田州府傳斬猛長子於工堯隘

臣

章宗瀛按工堯隘

統志云在州東一百二十里為州險隘此誤作隧謹據一統志及唐荆川集改

田州府傳巡撫御史曾守約以聞帝命守仁亟為勘處

臣章宗瀛按盧蘇作亂時守仁已卒時陶諧總督兩廣前鎮安傳中已改此處亦照前謹改

都康州傳建文元年後置

臣

章宗瀛按洪武止三十

一年其三十二年乃建文元年也永樂時革除建文
年號故統稱洪武今本紀既列建文年號而傳中不
宜仍循明時紀載之文謹據改

明史卷三百十八考證